

### Mban Dümhmei Pari

**1** Thaurei khou, Raguangh rui tingpuk kandih dümhlou khuan e. <sup>2</sup>Mi gүн khou tei kandih tei kalun makna khütni nsa-karangna büm khuan e. Duidai ta zinghmei rui gum zingh zing büm khuan e, kumna Raguangh tuang bumangh rui dui ru khou tei kalung büm khuan e. <sup>3</sup>Raguangh rui “Ganhmei nai kün di tho” tuna lütdün ti the, khoutei ganhmei püt the. <sup>4</sup>Ganhmei tei gai the tumei Raguangh rui hou the; kumna Raguangh rui ganhmei le zinghmei tipüt the. <sup>5</sup>Kamei rui ganhmei ta “Kalan” khütni zinghmei ta “Zinghbüng” tuna kau the. Zinghbüng tüt kün the, lauthuan guang düt the. Mi tei reimei tingmik the.

6-7 Khoutei Raguangh rui “Dui kük khou nsa-karang nai kün di tho kumna mi tei rui dui ta su-ntüm kün di tho,” tuna lütdün püt the, khoutei mi tei püt the. Kumna Raguangh rui nsa-karang dümhlou the, kumna mi tei rui dui ta nsa-karang ru khou khütni nsa-karang büng khou su-ntümlou the. <sup>8</sup>Kamei rui nsa-karang ta tei “Tingpuk” tuna kau the. Zinghbüng tüt kün the kumna lauthuan guang düt the. Mi tei zang neih neimei tingmik the.

9 “Tingpuk büng khou naimei dui guai hei kabüm akhüt khou guang kaduai kün di tho, kumna rümkiang nai kün di tho” tuna Raguangh rui lütdün püt the. Mi tei kumna püt the. <sup>10</sup>Kamei rui rümkiang ta tei “Kandih” khütni guang kaduai-loumei dui ta tei “Duipui” tuna kau the. Raguangh rui mi tei gai the tuna hou the.

11 “Kathai nthaimai, thingnui pannu, phunling-phunlu kazat guaina kandih khou püt kün di tho” tuna Raguangh rui lütdün püt the, kumna mi tei püt the. <sup>12</sup>Kumna kandih rui thingnui pannu kazat kaguaina tipüt the. Raguangh rui mi tei gai the tuna hou the. <sup>13</sup>Zingbüng tüt kün the kumna lauthuan guang düt the. Mi tei kathumhmei tingmik the.

14 Raguangh rui kumna lütdün ti the, “Zingbüng kalan nai khüng khütni kating-kaneih kakum-kagün thai khüng tingpuk khou ganhmei püt kün di tho. <sup>15</sup>Mi tei kandih khou ti-ganh khüng tingpuk khou ganh büm kün di tho.” Mi tei kumna püt kün the. <sup>16</sup>Kumna Raguangh rui ganhmei kanei—kalan khüng neihmik khütni zingbüng khüng bu kasiamhlou the. Kamei rui ganchuangna guai ta ni dümhlou the. <sup>17</sup>Kandih khou ganhlou khüng, <sup>18</sup>zingbüng kalan kaipou su büm khüng, khütni zinghmei khourui ganhmei

ti-ntüm püt khüing kamei rui tingpuk khou ganhmei kanei dümhlou the. Raguangh rui mi tei gai the tuna houlou the. <sup>19</sup>Zingbüng tüt kün the, lauthuan guang düt the. Mi tei padeihmei tingmik the.

20 “Dui khou tei ringhmei rümhkui zat mpeina rui padik kün di tho, khütni kandih ru khou nruai-thauruai rui padik kün di tho,” tuna Raguangh rui lüt-dün ti the. <sup>21</sup>Kumna Raguangh rui daihmei duipui khouringh daihmeinun, dui khou bümmei rümhkui zat guai kazat kazat suna, khütni nruai zat guaina ta kazat kazat suna dümhlou the. Raguangh rui mi tei gai the tuna hou the.

22 “King-nkiu püt tho kumna duipui ti padik tho, nruai-thauruai ni kandih ru khou padik püt tho” tuna Raguangh rui suaihiamlou the. <sup>23</sup>Zingbüng tüt kün the kumna lauthuan guang düt the. Mi tei zang panguhmei tingmik the.

24 “Kandih rui khouringh zat guaina tipüt kün di tho: kai khouringh khütni numbüing khouringh, khouringh daihmei ni nthiammei ni” tuna Raguangh rui lüt-dün püt the. Kumna mi tei püt the. <sup>25</sup>Raguangh rui mi guai tei dümhlou the, kumna mi guai tei gai the tuna hou the.

26 Khoutei Raguangh rui sa the, “Aniu mangh khou, aniu ta luihmei mansei kasiameh di kho; kaniu rui kha, nruai, khouringh kaguaina, khütni kai khouringh numbüing khouringh, daihmei nthiammei kapumna ru khou ngüm nai kün di tho. <sup>27</sup>Kumna Raguangh rui mansei ta dümhlou the, kata luihna dümhlou the. Kamei rui ntumei le n-ganmei dümhlou the.

28 Raguangh rui kata kumna suaihiamlou the, “Lunghking-lunghkiuna lungh püt tho, kandih kapum hei lungh padik püt tho kumna kandih ta hei sin tho, kumna kha-ga, nruai-thauruai, khütni kandih nüm ru khou kalung bümmei khouringh katana ru khou kauptou su tho.” <sup>29</sup>Nüp-bi zat kaguaina khütni tingthai-pannu zat kapumna nüngniu taktu khüing tilou the.

30 Numbüing khouringh guai khüing khütni nruai-thauruai khüing thingnui-pannu khütni ndiakmei thingbüng kaniu taktu khüing tilou the.” Mi tei kumna püt kün the. <sup>31</sup>Raguangh kamei rui dümhloumei puat guai ta tei zauh the, kumna kamei pian the. Zingbüng tüt kün the lauthuan guang düt the. Mi tei zang charukmei the.

**2** Hei kumna mban kapum hei dümhlou the. <sup>2</sup>Raguangh kamei rui tanh bümmei tan tei zang chaneime nung luai the kumna tanh nthak the. <sup>3</sup>Kamei rui zang chaneime tingmik ta tei suaihiamlou the. Mi tingmik ta tei nkunmei tingmik suna reihpütlou the, kalümthu mi nung tei dümhmei tan tei luai the kumna tanh nthak the. <sup>4</sup>Hei kumna mban ta hei dümhlou the.

### Eden Pikuan

Raguangh rui mban dümhpuai kan khou, <sup>5</sup>kandih khou rümhbuan mak khuan e khütni rümhthu akhütna sini kük püt mük khuan e, kalümthu kamei rui ting ti kei mük khuan e, khütni kailau tanhlou nime mansei mak khuan e. <sup>6</sup>Tiki kandih khourui achin thau lana kandih ta titimlou the. <sup>7</sup>Khoutei RINGHPOU Raguangh rui kandih khourui taniang la lana mi khou tei rui mansei kasiameh the. Kamei rui kanukuang khou ringhmei thiu mbunlou tina mansei tei ringh the.

8 Khoutei RINGHPOU Raguangh rui neihpüt biak thüing Eden khou pikuan akhüt kasiamehlou the. Kumna kamei rui kasiamehloumei mansei ta tei hei khou tei lou the.

9 Kamei rui mi khou tei hougaimie thingbüng zat kaguaina tithaulou the kumna tingthai gaimie ti-nthailou the. Mi pikuan chung khou tei ringhmei thingbüng khütni sime gaimie thaimie thingbüng thau büm khuan e.

10 Pikuan khou tei duithuak akhüt luang büm khuan e kumna mi tei rui mi pikuan tei titim büm khuan e; Eden luang tuan püt pukhou mi tei duiriang padeih khüing ruangra kün the. <sup>11</sup>Reime

duiriang tei Pishon the' mi tei Havilah kandih khou luang e. <sup>12</sup>(Mi Kandih khou tei kachak nthünmei nai e khütni kunghmei nümhgaimeitheauh khütni kamün kunghmei ntau ni nai e.) <sup>13</sup>Kan-eimeiduriang rui Gihon the; mi tei Kush kandih khou luang e. <sup>14</sup>Kathumhmeiduriang rui Tigris the; mi tei Assiria tuang neihpüt thüng luang e. Padeihmeiduriang rui Euphrates the.

15 Khoutei RINGHPOU Raguangh rui mansei ta tei Eden pikuan tei tanh büm khüng khütni gak büm khüng lou the.

16-17 Kamei rui kakhou sa the, "Simei gaimeitheimeithingbüng thai tei hümhna pikuan khou naimeitabui bui tingthai puni nüng tu nuh e. Mi büng thai tei nüng tu lük nina e; nüng mi tei tu e thei, tu rüp nung rui nüng theih puni."

18 Khoutei Raguangh rui sa the, "Mansei hei karana bümmei hei gai mük khe. Kata nkhalou khüng kapüm khüng chamei akhüt kasiamlou puni the."

19 Kumna kamei rui kandih khourui taniang la lana khouringh-khounah, nruai-thauruai kasiameithe. Mi guai züh tei phuaklou khüng Raguangh rui mi guai tei mansei khou tei la guang the; hei kumna kaniu züh tei nai künmeituang the. <sup>20</sup>Mipu tei rui khouringh-khounah khütni nruai-thauruai züh phuaklou the. Tiki mi guai tei akhütna sini kata nkhalou khüng chamei püm hümh the.

21 Khoutei RINGHPOU Raguangh rui manseipu ta tei tizip theihmüngh müng-hlou the, kumna kamei zip büm khou tei rui mipu tuang nakpairou akhüt la püt lana kazüh rui gum binlou düt the. <sup>22</sup>Mi rou khou tei rui ntumei akhüt kasiamei lana mipu khou tei la guang the. <sup>23</sup>Khoutei mipu tei rui sa the,

"Ntau thu, mi hei arou khourui la pütmei rou the, atei khourui la pütmei tei the,

kumpui zangrui kamei hei ntumeithe kalümthu kamei hei n-ganmeikhourui la pütmeituang e."

<sup>24</sup>Hei kum tina n-ganmei rui kapui kapu

ta günhlouna kanou le kariuna kanei akhütna su the.

25 Ntumei kanei n-ganmei tei pheiban piu mük ge, tiki kanei zük mük khuan e.

### Mansei Rui Lütliammei

**3** RINGHPOU Raguangh rui dümh-loumei püng khou nrui hei karou si liang e. Nrui tei rui ntumei khou tei thün e, "Pikuan khou naimeitabui bui büng thai puni tu nuh mük ge tuna Raguangh rui saloumeituang nai chünghna cho?"

2 "Ntumei tei rui nrui khou tei dau the," Pikuan khou naimeithingbüng katanathai tu nuh de, <sup>3</sup>tiki pikuan kachung khou nai bümmeithingbüng thai tei thu tu nuh mük ge, kahi sini kahi nuh mük ge; tu rüp be thei anei theih puni the, tuna Raguangh rui anei khou kadilou the."

4 Nrui tei rui dau the, "Kiu hümh e; nüng nei theih züt ni tuang hümh e. <sup>5</sup>Nüng nei mi tei tu e thei nüng nei Raguangh kum puni the tumei Raguangh kameithai lana mi tei sameituang e."

6 Kumna mipui tei rui mi thingbüng tei adih hougai cho khütni mi thai tei adih tugai ni cho tuna zauhlou the, khütni ningting püt re thei adih gai ni cho tumei kamei kakhüh the. Kumna kamei rui mi thai tei la lana tu the. Kamei rui kagan khüng ni asak ti tina kamei ni tu the.

7 Khoutei kanei mik rük püt the, kanei gannei tei paliu the tumei kanei thai the; kumna tadutnui hui kariu lana nsuai the.

8 Mi nung tingzin tei RINGHPOU Raguangh pikuan khou tei tüt bümmei khuan chu lana kanei thingbüng ding khou dup the. <sup>9</sup>Tiki RINGHPOU Raguangh rui manseipu ta tei kauhna “Nüing tabui thüing büm tu cho” tuna sa the. <sup>10</sup>Kamei rui sa the, “Pikuan khou tei ai nüing khuan chu the; kumna ai nüing ta pingna nkümh the. Kalümthu ai paliu the.”

11 “Nüing paliu e tumei thou rui nüing khou salou puna cho? Ai rui nüing ta tu riu tuna kadiloumei tingthai tei nüing tu lana cho?” tuna Raguangh rui sa the.

12 “Ai le büm nchüm khüing nüing rui tiloumei ntumei tei rui mi tingthai tei ti puna ai tu the” tuna mipu tei rui dau the.

13 “Tabui suna nüing hei kumna su büm cho?” tuna RINGHPOU Raguangh rui ntumei khou tei sa the. “Nrui rui ata duaih puna ai tu tina the,” tuna ntumei tei rui dau the.

### Raguangh Tuang Lützün

14 Khou tei RINGHPOU Raguangh rui nrui khou tei sa the, “Mi zang khourui nüing ta dündi ti puni the; khouringh kaguaina püng khourui nüing mi siang hei phungh nina the: Ntau khourui thauna nüing bung rui tuihna tüt puni the, khütni ringh san nüing taniang tuna lungh puni the.

15 Ai rui ntumei le nüing nei ta ti-houthoulou puni the; kakikta khütni nüing kikta hei houthou tün büm puni the. Kakikta rui nüing pi supiak puni the, kumna nüing rui kaphaichum khou nchou puni the.”

16 Kamei rui ntumei khou tei sa the, “Nüing nah phungh khou nüing rüm-rianra ai rui ti-mbu nlailou puni the khütni rianrana nah puanh puni the. Kum büm sini nüing gan ta kahauna lungh puni, kumna nüing kabüng khou büm puni.”

17 Kamei rui n-ganmei khou tei sa the, “Nüing nüing nou lüt chuna ai rui tu riu tuna kadiloumei thai tei nüing tu the. Hei zangrui kandih hei nüing zangrui siang phungh puni the. Nüing nüing pünti

sansangh nüing bung khüing rianrana tanhna lungh puni the. <sup>18</sup>Nüing khüing kandih khou sauh büng pu büng thau padik puni the, nüing numbüng thingnui pannu tu puni the. <sup>19</sup>Nüing ta kasiam-hloumei taniang khou nüing hün gut düt mük san nüing tuang talündui mün rui nüing tu puni the. Kalümthu nüing hei taniang e, nüing taniang khou hün gut düt nina e.”

20 Adam rui kanou ta Evi tuna kau the, kalümthu kamei hei mansei katana pui e. <sup>21</sup>Kumna RINGHPOU Raguangh rui rümhgi pheii Adam le kanou khüing kasiamhna kanei khüing piulou the.

### Adam Kanei Evi Ta Pikuan Khourui Nthauptmei

22 Khou tei RINGHPOU Raguangh rui sa the, “Ntau thu mansei hei aniu kum the kumna simei gaimai thaimai ningting hei kanei khou nai the. Kum thena ringhmei thingbüng thai tei reitu lana ting-sangzang ringh büm kün nuh the.” <sup>23</sup>Hei zangrui RINGHPOU Raguangh rui kanei ta Eden pikuan khourui nthau püt lana kata dümhloumei taniang khou tei kailau titan kün the. <sup>24</sup>Mi ringhmei thingbüng dang khou tei mei gan khütna sini guang mük khüing mi pikuan tuang neih-püt biak thüing kerubimnun lou the khütni kazüt kathui kahai nuhmei maibuang bangsang rui mi ringhmei thingbüng chang tei rihganlou the.

## THE HOLY BIBLE

*Rongmei Naga*

10 NAGR/88-89/5M/B001

ISBN 81-221-1530-6

*Published by :*

The Bible Society of India  
206 Mahatma Gandhi Road  
Bangalore - 560 001.

Printed in India by Photo offset process at  
Swapna Printing works pvt. Ltd, Calcutta-9